

## CONVENIO DE COLABORACIÓN ENTRE A CONSELLERÍA DE POLÍTICA SOCIAL E IGUALDADE E O CONCELLO DA PEROXA, PARA A COLABORACIÓN NO FINANCIAMENTO DO PROGRAMA "TECENDO VÍNCULOS: MAIORES ACTIVOS NA PEROXA" PARA O EXERCICIO 2025

Lugar e data da sinatura dixital,

### REUNIDOS

#### Dunha parte,

Dona Fabiola García Martínez, conselleira de Política Social e Igualdade, actuando en nome e representación da Consellería de Política Social e Igualdade, no uso das facultades que lle veñen atribuídas no artigo 34 da Lei 1/1983, do 22 de febreiro, de normas reguladoras da Xunta e da súa Presidencia; no Decreto 44/2024, do 14 de abril, do seu nomeamento; no Decreto 42/2024, do 14 de abril, polo que se establece a estrutura orgánica da Xunta de Galicia, no Decreto 49/2024, do 22 de abril, polo que se fixa a estrutura orgánica das consellerías da Xunta de Galicia, no Decreto 139/2024, do 20 de maio, polo que se establece a estrutura orgánica da Consellería de Política Social e Igualdade e no establecido no Acordo do Consello da Xunta de Galicia, do 27 de marzo de 1991.

#### Doutra parte,

Don Manuel Seoane Rodríguez, en calidade de Alcalde do Concello da Peroxa, con número de Identificación Fiscal P3206000F, e enderezo na Praza do Concello, 83, A Peroxa (Ourense), tal como se reflicte na acta da sesión de constitución deste concello, que tivo lugar o día 17 de xuño de 2023 en uso das facultades que lle veñen atribuídas polo artigo 21 da Lei 7/1985, do 2 de abril, de Bases de Réxime Local.

Interveñen en función dos seus respectivos cargos, e no exercicio das facultades que para convir no nome das entidades que representan teñen conferidas.

### EXPOÑEN

**Primeiro.-** Que as Administracións Públicas poden celebrar convenios de colaboración con outras administracións ou entes de dereito público e con persoas físicas ou xurídicas ao abeiro do disposto no capítulo VI do título preliminar da Lei 40/2015, do 1 de outubro, do réxime xurídico do sector público.

**Segundo.-** Que o Estatuto de autonomía de Galicia encomenda aos poderes públicos galegos a obriga de promover as condicións para que a liberdade e a igualdade do individuo e dos grupos en que se integran sexan reais e efectivas, ademais de remover os atrancos que impidan ou dificulten a súa plenitude e de facilitar a participación de todos os galegos na vida política, económica, cultural e social.



Que a Comunidade Autónoma de Galicia, segundo o establecido no artigo 27.23 do Estatuto de autonomía de Galicia, en consonancia coas competencias outorgadas ás comunidades autónomas polo artigo 148.1.20 da Constitución española, ten competencia exclusiva en materia de asistencia social, polo que, na súa virtude aprobouse a Lei 13/2008, do 3 de decembro, de servizos sociais de Galicia.

**Terceiro.-** Que a Consellería de Política Social e Igualdade é o órgano superior da administración autonómica ao que lle corresponde as competencias en materia de servizos sociais, e consecuentemente a atención do colectivo de persoas maiores, conforme ao Decreto 139/2024, do 20 de maio, polo que se establece a estrutura orgánica da Consellería de Política Social e Igualdade.

Que con carácter específico lle corresponden, entre outras, a elaboración das políticas dirixidas ás persoas maiores en aplicación da Lei 13/2008, do 3 de decembro, e da Lei 39/2006, do 14 de decembro, de promoción da autonomía persoal e atención ás persoas en situación de dependencia. En particular no marco desas competencias están comprendidas as funcións relativas ao fomento e á promoción da autonomía persoal, do envellecemento activo e das relacións interxeracionais.

**Cuarto.-** Que o Decreto 193/2011, do 6 de outubro, polo que se regulan especialidades nas subvencións ás entidades locais galegas, unifica os criterios nos procedementos de concesión, xestión e xustificación das subvencións ás entidades locais galegas para evitar disfuncións administrativas e inseguridade xurídica e establecer unha serie de mecanismos que teñan como principio inspirador a lealdade institucional nas relacións subvencionais entre a Administración autonómica e as entidades locais.

**Quinto.-** Que de conformidade co previsto na Lei 13/2008, do 3 de decembro, e na lexislación de aplicación sobre réxime local, correspóndelles aos concellos, no marco da planificación e ordenación xeral do sistema galego de servizos sociais, as seguintes competencias:

- a) A creación, xestión e mantemento dos servizos sociais comunitarios básicos.
- b) A creación, xestión e mantemento dos servizos sociais comunitarios específicos, sen prexuízo do establecido no artigo 59, letra i), da Lei 13/2008, do 3 de decembro.
- c) A colaboración no fomento dos servizos sociais prestados por entidades de iniciativa social, así como a promoción de mecanismos de coordinación das actuacións realizadas polas mesmas, evitando no posible a duplicidade e infrautilización dos equipamentos sociais.



- d) A promoción e realización de estudos e investigacións sobre a problemática dos servizos sociais no ámbito local e a divulgación dos resultados obtidos nos mesmos.
- e) A detección e análise das necesidades e da problemática social existente no seu ámbito territorial.
- f) A elaboración de plans e programas de servizos sociais no seu ámbito territorial, de conformidade co previsto no artigo 48 da Lei 13/2008, do 3 de decembro.
- g) A participación, como entidade colaboradora, na xestión das prestacións económicas e, no seu caso, nas subvencións concedidas pola Xunta de Galicia, nos termos legalmente establecidos.
- h) O fomento e promoción da solidariedade e da participación da sociedade civil na prevención e intervención social no ámbito local.
- i) A creación, regulación e impulso de mecanismos de participación local no ámbito dos servizos sociais.
- j) A coordinación dos servizos sociais cos restantes servizos municipais e das restantes administracións no desenvolvemento dos plans e programas de intervención comunitaria, facilitando a participación das entidades sociais e a implicación da cidadanía no proceso.
- k) Cantas outras lles estean atribuídas ou lles sexan delegadas, de acordo coa lexislación vixente.

Estas competencias exerceranse polos concellos, por si mesmos ou asociados, ou a través das fórmulas de colaboración interadministrativa, a fin de alcanzar unha maior eficacia e rendibilidade social dos recursos dispoñibles.

Para a mellor atención das necesidades sociais do seu ámbito territorial, e unha vez garantida a prestación dos servizos sociais comunitarios básicos e demais competencias enumeradas no artigo 60 da referida Lei 13/2008, do 3 de decembro, os concellos de Galicia, segundo o establecido no artigo 60.1.b) desta mesma Lei, poderán crear, xestionar e manter servizos sociais comunitarios específicos, en coordinación coa Xunta de Galicia e de acordo co catálogo de servizos sociais e a planificación correspondente. Así mesmo, de conformidade co disposto no artigo 62 da Lei 13/2008, do 3 de decembro, para a mellor atención das necesidades sociais do seu ámbito territorial e unha vez garantida a prestación dos servizos sociais comunitarios básicos e demais competencias enumeradas no artigo 60 da referida Lei, os concellos de Galicia poderán crear, xestionar e manter servizos sociais especializados, en coordinación coa Xunta de Galicia e de acordo co catálogo de servizos sociais e a planificación correspondente. Así a referida norma no seu artigo 64 prevé que a Xunta de Galicia promoverá unha efectiva coordinación e cooperación cos concellos a fin de



asegurar a calidade e unha cobertura equilibrada dos servizos sociais en todo o territorio, especialmente no que atinxe á creación e mantemento de servizos sociais comunitarios específicos.

Segundo o establecido nos artigo 12 da Lei 13/2008, do 3 de decembro, os servizos sociais comunitarios específicos, competencia das entidades locais, desenvolverán programas e xestionarán centros orientados a colectivos con problemáticas identificadas e singulares, procurando a súa normalización e reincorporación social ou como espazo de tránsito a un servizo especializado. Así, de acordo co establecido no artigo 25 do Decreto 99/2012, do 16 de marzo, polo que se regulan os servizos sociais comunitarios e o seu financiamento, sen prexuízo da súa dedicación a colectivos con problemáticas concretas, os servizos sociais comunitarios específicos actuarán, en tanto que servizos de proximidade, na contorna vital das persoas destinatarias, favorecendo o mantemento dos seus vínculos familiares e comunitarios, a súa autonomía e calidade de vida.

**Sexto.-** Que o Concello da Peroxa está inscrito no Rexistro Único de Entidades Prestadoras de Servizos Sociais como entidade prestadora de servizos sociais co número E650 e recoñecido como así se determina no art. 66 da Lei 13/2008 do 3 de decembro.

**Sétimo.-** O Concello da Peroxa presenta unha realidade demográfica claramente marcada polo envellecemento da poboación, a dispersión xeográfica e unha elevada porcentaxe de persoas maiores, factores que xustifican plenamente a necesidade de implantar políticas e programas orientados ao benestar en idades avanzadas.

Segundo datos do Instituto Galego de Estatística (IGE) e do Instituto Nacional de Estadística (INE), a poboación actual do municipio sitúase arredor dos 1.800 habitantes, cunha tendencia descendente nos últimos anos e cunha estrutura de idade claramente avellentada. A idade media estimada para o territorio, en coherencia cos datos da provincia de Ourense, supera os 51 anos, sendo unha das máis elevadas a nivel estatal. Esta cifra reflicte o desprazamento da pirámide poboacional cara ás idades superiores, resultado da combinación do descenso da natalidade, o éxodo da poboación máis nova e o incremento da esperanza de vida.

A situación faise aínda máis preocupante ao analizar a porcentaxe de persoas maiores. Estímase que arredor do 30% da poboación da Peroxa supera os 65 anos, mentres que as proxeccións demográficas apuntan a que, en poucos anos, máis do 50% da poboación poderá ter 55 ou máis anos, en liña coas previsións xerais para Galicia e, en particular, para a provincia de Ourense. Este contexto demográfico supón un reto de primeira orde, especialmente no ámbito rural, onde a dispersión territorial dificulta a prestación de servizos e o acceso a recursos por parte da poboación maior.

O Concello da Peroxa conta con 132 entidades de poboación e 14 parroquias, o que implica



unha alta dispersión xeográfica. Esta realidade provoca que moitas persoas maiores residan en núcleos pequenos, illados e con escasa densidade de poboación, o que incrementa os niveis de soidade non desexada e o risco de exclusión social. Ademais, unha parte significativa destas persoas viven en fogares unipersoais ou compostos exclusivamente por maiores, o que reforza a urxencia de intervencións que fomenten a interacción social, o apoio comunitario e o mantemento da autonomía.

O Concello da Peroxa mediante o Programa "*Tecendo Vínculos: Maiores activos na Peroxa*" quere chegar á consecución dunha actitude positiva ante o propio proceso de envellecemento e unha vinculación e participación social activa. Móstrase nesta proposta de intervención, e seguindo a mensaxe da OMS, ao envellecemento activo como "*O proceso de optimización das oportunidades da saúde, a participación e a seguridade co fin de mellorar a calidade de vida a medida que as persoas envellecen; permítelles ás persoas realizar o seu potencial de benestar físico, social e mental ao longo de todo o seu ciclo vital e participar na sociedade de acordo coas súas necesidades, desexos, e capacidades, mentres que se lles proporciona protección, seguridade e cuidados axeitados*".

Desde o Concello da Peroxa terase en conta unha serie de indicacións esenciais á hora de traballar no proceso de envellecemento activo entre os que están:

- a) Ter unha boa saúde mediante a unha prevención e promoción axeitada.
- b) Ter un bo funcionamento físico, manter a actividade e realizar exercicio físico. Os efectos beneficiosos do exercicio regular fan que constitúa a acción con maior soporte de evidencia para promover o envellecemento activo saudable.
- c) Ter un bo funcionamento mental co mantemento da capacidade mental e de aprendizaxe.
- d) Ser independente e autónomo coa prevención específica da discapacidade e da dependencia.
- e) Promover e manter a actividade e a participación social.

Débase, por tanto, transmitir a todos os grupos de idade e sociais, e en especial, ás persoas maiores unha idea de vida onde a práctica regular de exercicio físico e mental sexa o eixe da súa vida diaria. É preciso que a poboación en xeral adopte unha actitude positiva fronte a aquelas prácticas que poidan favorecer e potenciar os hábito saudables: o exercicio físico, o exercicio cognitivo, a alimentación, a hixiene, a relación cas demais persoas, ensinar a querer e coidar o propio corpo facilitando as ferramentas precisas para conseguilo.

O tempo libre e de lecer, no grupo das persoas maiores, é unha parte obrigada para unha vellez produtiva e sa na que se deben ter en conta unas condicións básicas como son: a calidade de vida da persoa anciá, o aproveitamento do tempo libre así como as condicións



físico/psicológicas inseparables e imprescindibles para o desenvolvemento de calquera actividade.

**Oitavo.-** Que o programa "Tecendo Vínculos: Maiores Activos na Peroxa" obxecto de subvención, baséase nos seguintes piares:

- Dinamizar a vida cotiá e social das persoas maiores.
- Potenciar a participación e a cooperación social.
- Entender o proceso de envellecemento como unha fase importante da evolución do ser humano, mellorando de esta maneira a calidade de vida das persoas maiores.
- Previr a dependencia e aparición dos déficits propios da idade fomentando actividades e prácticas que fomenten a vida saudable.

O Concello da Peroxa con este Programa pretende acadar nas persoas maiores estimular e potenciar o desenvolvemento e o mantemento das funcións cognitivas, manter e mellorar as calidades cognitivas (memoria, atención, orientación espacial, temporal, psicomotricidade) e físicas da persoa maior así como optimizar os niveis de benestar subxectivo, diminuíndo os sentimento de soidade, mellorar o estado de ánimo e a motivación interna, potenciar o contacto social e a comunicación, mediante habilidades comunicativas facendo fincapé na autoestima das persoas maiores, mellorar o mantemento de hábitos saudables e ofrecer novos ámbitos para o aprendizaxe en diferentes ámbitos da sociedade.

A realización do Programa "*Tecendo vínculos: Maiores activos na Peroxa*" convértese nun vehículo de creatividade e de emocións, facilita ás persoas participantes o mantemento dun rol activo e mantén unha continuidade e progresión no proxecto, adaptando as propostas ás necesidades e motivacións do grupo e ás situacións que favorezan as relacións interpersoais.

As actividades constitutivas do antedito programa están planificadas para desenvolverse por áreas temáticas, ben sexa a través do persoal do Concello da Peroxa encargado de organizar as visitas e actividades culturais ou subcontratado cunha empresa relacionada coa organización destas actividades.

As actividades do programa a subvencionar a través deste convenio teñen encaixe entre as funcións propias dos servizos sociais comunitarios específicos tal que:

- A atención de persoas maiores en equipamentos e servizos que faciliten o envellecemento activo e a súa socialización, a prevención da dependencia e promoción da autonomía persoal.



- A xestión doutros equipamentos sociais non residenciais destinados ao desenvolvemento de programas para sectores da poboación con necesidades sociais diferenciadas que posibiliten o logro dos obxectivos do sistema galego de servizos sociais.

**Noveno.-** O carácter singular deste convenio, en base ás razóns que acreditan o interese social do mesmo, radica nunha necesidade real, concreta e crecente, sustentada en datos demográficos obxectivos, e alíñase cos principios das políticas públicas orientadas ao benestar das persoas maiores e á cohesión social no medio rural.

As razóns expostas (características da poboación e as actuacións do programa) e a particularidade e exclusividade da entidade que desenvolve este programa motiva a concesión de forma directa desta subvención debido á dificultade da súa convocatoria pública, en base aos artigos 19.4 c) e 26 da Lei 9/2007, do 13 de xuño, de subvencións de Galicia, e no artigo 40 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

**Décimo.-** Que ambas as dúas partes consideran de mutuo interese establecer fórmulas de colaboración para o financiamento de programas no eido da atención ás persoas maiores, especialmente no envellecemento activo, na atención á dependencia, no fomento da autonomía persoal, na prevención da situación de dependencia e no agravamento desta.

Por todo elo, as partes comparecentes na representación que ostentan

### **ACORDAN**

Asinar o presente convenio de colaboración en base ás seguintes

### **CLÁUSULAS**

#### **PRIMEIRA. *Obxecto***

O obxecto do presente convenio é contribuír ao financiamento mediante a concesión dunha subvención de carácter directo por parte da Consellería de Política Social e Igualdade do programa "*Tecendo vínculos: Maiores activos na Peroxa*" que o Concello da Peroxa ten previsto desenvolver, durante o ano 2025, para fomentar envellecemento activo. O dito programa está encamiñado á atención das persoas maiores de 55 anos residentes no concello da Peroxa.

#### **SEGUNDA. *Actuacións subvencionables***

1. As actividades que comprenden o programa "*Tecendo vínculos: Maiores activos na Peroxa*" atenden a oito áreas temáticas que a seguir se relacionan e que se recollen, polo miúdo na memoria explicativa:



**a) Área Artístico-manual** na que se levarán a cabo dous obradoiros, o de de manualidades (reciclaxe creativa, macramé, bordado...) e o de de musicoterapia ou baileterapia.

**b) Área de estimulación cognitiva** con actividades baseadas na orientación, léxico, cálculo e atención/memoria.

**c) Área de ximnasia de mantemento**, na que se realizarán diversas actividades como pilates, ioga, relaxación, aquagym, camiñatas, con saída desde as diferentes parroquias, con picnic comunitario, mobilidade e flexibilidade.

**d) Área de espazos lúdicos** no que se desenvolverán xogos de mesa, dinámicas grupais, xogos populares.

**e) Área de visitas culturais.** Con esta actividade anual, o Concello busca fomentar a participación social, o acceso á cultura e o desfrute do patrimonio por parte das persoas maiores, contribuíndo así ao seu benestar físico, mental e social. Trátase dunha gran oportunidade para que os veciños e as veciñas de diferentes parroquias se xunten e se relacionen entre si.

**f) Área de diversos obradoiros ou talleres:**

1. Obradoiro contra a brecha dixital cuxo desenvolvemento responderá aos intereses e ás peticións das persoas usuarias sobre o uso do teléfono móbil e dispositivos, fotografía na natureza, banca electrónica ou diversos trámites online.

2. Obradoiro de cociña

3. Obradoiro de cestería

4. Obradoiro de apicultura

5. Obradoiro de hortoterapia e xardinería

6. Obradoiro de iniciación ao teatro

7. Obradoiro de canto coral

8. Obradoiro de alimentación terapéutica

**g) Área de charlas e conferencias** sobre *"Os pasos de barca no Río Miño"*, *"A construción da presa de Peares e o Poboado de Fenosa"*, *"O impacto da chegada do tren a Os Peares"*, *"As mallas e as vendimas, do pasado á actualidade"*... Participará a veciñanza do concello contando e revivindo tempos pasados, pondo en valor a herdanza cultural do territorio.

**h) Área do día mundial** no que farase unha pequena mención á temática á que se adica internacionalmente o día específico con debates, grupos de discusión e visionados. A intención é que os/as participantes estimulen a súa memoria, promovan o pensamento crítico e faciliten a conexión emocional coas súas experiencias. Por exemplo, o 12 de agosto é



o Día Internacional da Xuventude (tema para o debate “Como cambiou a xuventude ao longo dos anos“?), o 21 de setembro é o Día Mundial do Alzheimer (tema para o debate “ A importancia da memoria e como coidala“).

Ademais de xerar debate sobre a temática, faránse visionados de filmes, documentais ou fragmentos de vídeo relacionados coa temática. Terá unha duración de 1 hora cun máximo de 25 participantes).

### **TERCEIRA. Obrigas e documentación inicial**

En virtude do disposto na Lei 38/2003, do 17 de novembro, xeral de subvencións e no Real Decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, xeral de subvencións; na Lei 9/2007, do 13 de xuño, de subvencións de Galicia, e no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, o Concello da Peroxa presentará con carácter previo á sinatura do convenio o programa de actuacións obxecto da concesión da subvención e a seguinte documentación:

- a) Declaración comprensiva de todas as axudas e subvencións solicitadas ou concedidas para as mesmas actuacións, ou, de ser o caso, unha declaración de que non solicitaron nin percibiron outras axudas ou subvencións.
- b) Declaración responsable, subscria pola representante da entidade local, de non estar incurso nas prohibicións para obter a condición de beneficiaria de subvencións sinaladas nos apartados 2 e 3 do artigo 10 da Lei 9/2007, do 13 de xuño.
- c) Declaración responsable do cumprimento da obriga establecida no artigo 4.1 do Decreto 193/2011, do 6 de outubro, polo que se regulan especialidades nas subvencións ás entidades locais galegas, en canto ao cumprimento do deber de remisión ao Consello de Contas das contas xerais de cada exercicio.

### **CUARTA. Orzamento**

A previsión do orzamento de gastos para o desenvolvemento das actuacións que ten previsto desenvolver o Concello da Peroxa é de vinte mil euros (20.000,00€).

Para o cumprimento das actuacións descritas na cláusula segunda deste convenio a Consellería de Política Social e Igualdade achegará **vinte mil euros (20.000,00€)**, que serán imputados á aplicación orzamentaria **08.05.312E.460.0** dos orzamentos xerais da Comunidade Autónoma de Galicia para o ano 2025.

Segundo a Lei 4/2024, do 27 de decembro, de orzamentos xerais da Comunidade Autónoma de Galicia para o ano 2025, está previsto crédito axeitado e suficiente para poder dar cobertura económica aos compromisos contraídos en virtude deste convenio.



O importe da subvención destinarase a cubrir os gastos de persoal e de natureza corrente efectivamente realizados para o desenvolvemento das actuacións recollidas na cláusula segunda. A estes efectos, consideraranse gastos subvencionables os previstos no artigo 29 da Lei 9/2007, do 13 de xuño.

#### **QUINTA . *Obrigas da entidade beneficiaria***

1. En cumprimento do artigo 11 da Lei 9/2007, do 13 de xuño, do Decreto 11/2009, do 8 de xaneiro e do Decreto 193/2011, do 6 de outubro, son obrigas da entidade beneficiaria:

a) Cumprir os requisitos para obter a condición de entidade beneficiaria estipulados no artigo 10 da Lei 9/2007, do 13 de xuño.

b) Cumprir todos e cada unha das actuacións do programa a subvencionar a través deste convenio, adoptar os comportamentos que fundamentaron a concesión da subvención e cumprir os compromisos asumidos con motivo desta. Noutro caso, procederá o reintegro total ou parcial do importe da subvención, atendendo aos criterios establecidos no convenio.

c) Xustificar ante a Consellería de Política Social e Igualdade o cumprimento dos requisitos e das condicións, así como a realización das actuacións que conforman o programa a subvencionar a través deste convenio e o cumprimento da finalidade que determinen a concesión ou o gozo da subvención.

d) Someterse ás actuacións de comprobación, que efectuará a Consellería de Política Social e Igualdade, así como a calquera outra actuación de fiscalización e control financeiro, que poidan realizar a Intervención Xeral da Comunidade Autónoma, o Tribunal de Contas e o Consello de Contas para o que se facilitará tanta información lle sexa requirida no exercicio das actuacións anteriores.

e) Comunicarlle ao órgano concedente a obtención doutras subvencións, axudas, ingresos ou recursos para a mesma finalidade, procedentes de calquera administración ou entes públicos ou privados, nacionais, da Unión Europea ou de organismos internacionais, así como a modificación das circunstancias que fundamentasen a concesión da subvención. Esta comunicación deberá efectuarse no momento no que se coñeza e, en todo caso, con anterioridade á xustificación da aplicación dada aos fondos percibidos.

f) Dispoñer dos libros contables, rexistros dilixenciados e demais documentos debidamente auditados nos termos esixidos pola lexislación mercantil e sectorial aplicable á a entidade beneficiaria en cada caso, así como cantos estados contables e rexistros específicos sexan esixidos polas bases reguladoras establecidas no convenio, coa finalidade de garantir o axeitado exercicio das facultades de comprobación e control.



g) Conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das actuacións de comprobación e control.

h) Incluír na publicidade e en todo tipo de documentación e información relacionada coas actuacións obxecto do programa a subvencionar a través deste convenio e nos lugares onde estas se realicen: “subvencionado pola Xunta de Galicia – Consellería de Política Social e Igualdade”, co seu respectivo logotipo.

i) Proceder ao reintegro dos fondos percibidos nos supostos previstos no artigo 33 da Lei 9/2007, do 13 de xuño, e artigo 74 e seguintes do Decreto 11/2009, do 8 de xaneiro.

j) Presentar a documentación trala sinatura do convenio e no momento da xustificación parcial e/ou total, de conformidade co indicado na normativa de subvencións.

2. Asemade, o Concello da Peroxa, en tanto que entidade beneficiaria dunha subvención, estará obrigado a subministrar á Consellería de Política Social e Igualdade, logo de requirimento, toda a información necesaria para o cumprimento por aquela das obrigas previstas no Título I da Lei 1/2016, de transparencia e bo goberno. No caso de incumprimento desta obriga estarase ao disposto no artigo 4.4 da citada lei.

#### **SEXTA. *Compatibilidade con outras subvencións***

A subvención prevista neste convenio non é compatible con outras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou de organismos internacionais.

#### **SÉTIMA. *Forma de pagamento***

1. Respecto ao pagamento da subvención estarase ao disposto na Lei 38/2003, do 17 de novembro; no Real Decreto 887/2006, do 21 de xullo; na Lei 9/2007, do 13 de xuño; no Decreto 11/2009, do 8 de xaneiro, e no Decreto 193/2011, do 6 de outubro.

2. O libramento farase nunha conta corrente da que sexa titular o Concello da Peroxa nas seguintes condicións:

a) Efectuarase un pagamento do 70% da totalidade da subvención, con carácter de anticipo a conta da liquidación, unha vez asinado o presente convenio.

b) O 30% restante farase efectivo unha vez rematadas tódalas actuacións que conforman o programa a subvencionar a través do convenio e achegando a documentación indicada na cláusula oitava.

3. Para a tramitación das condicións de pagamento previstas nos apartados anteriores, a entidade beneficiaria da subvención queda exonerada da constitución de garantía ao entrar no suposto previsto no artigo 65.4.f) do Decreto 11/2009, do 8 de xaneiro.



4. Con carácter previo ao pagamento poderá consultarse, salvo oposición por parte da entidade beneficiaria, o cumprimento das súas obrigas tributarias, coa Seguridade Social e coa facenda da Administración Pública da Comunidade Autónoma de Galicia, así como non ser debedora por resolución de procedemento de reintegro. De opoñerse terá que facelo de xeito expreso tal e como sinala o artigo 28 da Lei 39/2015, do 1 de outubro, do procedemento administrativo común das administracións públicas e achegar os xustificantes ou documentación necesaria para acreditar o seu cumprimento como se indica na cláusula oitava.

#### **OITAVA. Gastos subvencionables e xustificación**

1. Son gastos subvencionables os que cumpran os requisitos fixados polo artigo 29 da Lei 9/2007, de 13 de xuño, recollidos na memoria económica. Para estes efectos, considerarase gasto realizado cando se teña contabilizado o recoñecemento da obriga polo órgano competente da entidade local.

2. O Concello da Peroxa está obrigado a acreditar documentalmente a efectividade dos pagamentos realizados de conformidade co establecido no Decreto 193/2011, de 6 de outubro.

3. O Concello da Peroxa está obrigado a xustificar ante a Consellería de Política Social e Igualdade, o cumprimento da finalidade das actuacións do programa a subvencionar a través deste convenio, a realización da actividade e o seu custo real, mediante unha conta xustificativa integrada, con carácter xeral, pola documentación que se relaciona de seguido e que incorporará, en todo caso, a certificación da intervención ou do órgano que teña atribuídas as facultades de control da toma de razón en contabilidade do gasto efectuado e do cumprimento da finalidade para a que foi concedida a axuda.

Segundo o disposto no artigo 9 do Decreto 193/2011, do 6 de outubro, a conta xustificativa conterá:

a) Certificación expedida pola secretaría da entidade local, co visto e prace do alcalde, relativa á aprobación polo órgano competente da conta xustificativa da subvención, en que se faga constar, como mínimo, de forma detallada:

1.º O cumprimento da finalidade da subvención, con especificación das actuacións desenvolvidas en execución do programa a subvencionar a través deste convenio e dos resultados acadados.

2.º Os distintos conceptos e contías correspondentes aos gastos totais soportados pola entidade beneficiaria imputables ás actuacións que conforman o programa subvencionado coa seguinte relación: identificación da persoa acreedora, número de factura ou documento



equivalente, importe, data de emisión e data de recoñecemento da obriga polo órgano competente. Non será exixible a remisión dos documentos relacionados no artigo 48.2 b) do Decreto 11/2009, do 8 de xaneiro.

b) Unha relación detallada doutros ingresos ou subvencións que financiasen o programa subvencionado con indicación do importe e a súa procedencia.

c) De ser o caso, os tres orzamentos que se esixen en aplicación do artigo 29.3.º da Lei 9/2007, do 13 de xuño.

Tendo en consideración que existe gasto imputable a persoal conforme ao establecido no orzamento do programa deberá concretarse aos efectos da súa xustificación e referida á mensualidade ou mensualidades polas que se solicita, a seguinte documentación:

- Relación nominal do traballador/a que se inclúen como xustificación do programa subvencionado.
- Recibos de salarios.
- Documento de relación nominal de traballadores (RNT) e documento de relación de liquidación de cotizacións (RLC) dos traballadores correspondentes aos meses imputados.
- Impresos de liquidación nominal do IRPF (modelos 111 e 190).

Asemade, xunto coa conta xustificativa, no caso de opoñerse á súa consulta, deberase achegar a declaración responsable do cumprimento das súas obrigas tributarias e coa Seguridade Social e de non ter pendente de pagamento ningunha débeda coa Administración Pública da Comunidade Autónoma de Galicia ou de ser debedor por resolución de procedemento de reintegro, segundo o disposto no artigo 11 do Decreto 11/2009, do 8 de xaneiro.

Cando formen parte da conta xustificativa documentos de gastos de nóminas ou que comporten ingresos á conta do IRPF ou cotas por seguros sociais de 2025 liquidables con posterioridade á data de xustificación, o importe destes ingresos ou cotas considérase xustificado coa presentación do documento de gasto, factura ou documento equivalente, no que se reflecta o importe da retención ou cotización acumuladas na data de xustificación, quedando a entidade beneficiaria obrigada a presentar os documentos acreditativos da súa liquidación con data límite na primeira quincena de febreiro de 2026.

4. En todo caso o prazo da xustificación total da subvención deste convenio rematará o día **10 de decembro de 2025**.

5. A falta de presentación da xustificación no prazo establecido comportará a perda do dereito á subvención e a procedencia do reintegro do importe desta, ou da parte proporcional non xustificada, e demais responsabilidades establecidas na Lei 9/2007, do 13 de xuño.



### **NOVENA. Subcontratación**

O Concello da Peroxa é a entidade beneficiaria directa da subvención obxecto deste convenio, asumindo a total responsabilidade da execución das actuacións que conforman o programa subvencionado fronte á Consellería de Política Social e Igualdade. Non obstante, poderá subcontratar a execución total das actividades, ata o 70% do importe total do programa financiado a través do mesmo para a súa debida execución, de acordo co recollido na memoria económica. A subcontratación vén motivada pola falla de persoal do Concello da Peroxa necesario para a execución das actuacións que conforman o programa a subvencionar a través deste convenio.

Para estes efectos será de aplicación o establecido nos artigos 29 da Lei 38/2003, do 17 de novembro, e 27 da Lei 9/2007, do 13 de xuño.

### **DÉCIMA. Inexistencia de relación laboral**

Para levar a cabo os obxectivos e fins deste convenio o Concello da Peroxa poderá contratar, con cargo ao orzamento do presente convenio, o persoal que no seu caso precise para o desenvolvemento das actuacións citadas na cláusula segunda. Así mesmo queda facultado para designar o persoal do propio concello necesario para realizar as actividades propostas.

A subscripción do presente convenio non leva consigo relación laboral nin contractual entre a Consellería de Política Social e Igualdade e as persoas que realicen as actuacións obxecto do programa a subvencionar, de tal xeito que non se lle poderá esixir ningunha responsabilidade, nin directa nin subsidiaria, polos actos ou feitos acaecidos no desenvolvemento do dito programa.

O Concello da Peroxa asume a responsabilidade respecto do persoal que asume as obrigas de levar a cabo as actuacións establecidas no programa a subvencionar a través do convenio.

### **DÉCIMO PRIMEIRA. Incumprimentos, reintegros e sancións**

Producirase a perda do dereito ao cobro total ou parcial da axuda no suposto de falta de xustificación do cumprimento das actuacións a subvencionar a través do convenio, dos deberes contidos nestas cláusulas, dos deberes contidos no artigo 33 da Lei 9/2007, do 13 de xuño ou na demais normativa aplicable, o que dará lugar á obriga de devolver total ou parcialmente a axuda percibida, así como os intereses de demora correspondentes.

O procedemento para declarar a orixe da perda do dereito de cobramento da axuda e para facer efectiva a devolución a que se refire o apartado anterior será o establecido no Título II da Lei 9/2007, do 13 de xuño.

Sempre que se cumplan os requisitos ou condicións esenciais reflectidos no convenio, a



Consellería de Política Social e Igualdade poderá apreciar un incumprimento parcial e deberá resolver sobre o seu alcance, aplicando a mesma ponderación que tivera a condición incumplida no convenio e, se é o caso, establecendo o deber de reintegro.

Cando se trate de condicións referentes á contía ou conceptos do obxecto subvencionable, o alcance do incumprimento determinarase proporcionalmente ao gasto deixado de practicar ou aplicado a conceptos distintos dos considerados subvencionables e, se é o caso, deberán reintegrarse as cantidades percibidas en dita proporción. Con carácter xeral, se o incumprimento superara o 65% das actuacións que comprenden o programa a subvencionar a través do convenio, entenderase que dito incumprimento é total, e deberán reintegrarse todas as cantidades percibidas e o seus xuros de demora.

Á entidade beneficiaria da subvención regulada nestas bases seralle de aplicación o réxime de infraccións e sancións previstas no Título IV da Lei 9/2007, do 13 de xuño, de subvencións de Galicia e no Título VI do seu regulamento.

#### **DÉCIMO SEGUNDA. *Vixencia e efectos***

O presente convenio estenderá os seus efectos dende a súa formalización e terá vixencia ata o 31 de decembro de 2025.

Non obstante, os gastos das accións englobadas nas actividades a subvencionar descritas no presente convenio que realizase o concello dende o 1 de xaneiro de 2025 e ata o día 10 de decembro, tamén poderán ser subvencionadas ao seu abeiro coa achega da Consellería de Política Social e Igualdade.

En todo caso o prazo da xustificación total da subvención deste convenio rematará o día **10 de decembro de 2025**.

#### **DÉCIMO TERCEIRA. *Obrigas de publicidade***

O presente convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro, e no Decreto 126/2006, do 20 de xullo, polo que se regula o rexistro de convenios da Xunta de Galicia. Así mesmo, será obxecto de publicación e inscrición en cumprimento do disposto no artigo 17 da Lei 1/2016, do 18 de xaneiro, o artigo 15 da Lei 9/2007, do 13 de xuño, e no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.

As partes asinantes consenten dar publicidade dos seus datos persoais e demais especificacións recollidas no presente instrumento de colaboración no Portal de Transparencia e Goberno Aberto.



De conformidade coa Lei 38/2003, do 17 de novembro, o instrumento de colaboración e a información sobre a subvención serán comunicados á Base de Datos Nacional de Subvencións.

#### **DÉCIMO CUARTA. Información básica de protección de datos persoais**

As partes asinantes deste convenio garantirán a confidencialidade dos datos persoais aos que teñan acceso como consecuencia das actuacións realizadas en execución deste e de conformidade co disposto na Lei orgánica 3/2018, de 5 de decembro, de protección de datos persoais e garantía dos dereitos dixitais e no Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e a libre circulación de estes datos e polo que se derroga a Directiva 95/46/CE (Regulamento xeral de protección de datos).

Os datos persoais recadados neste procedemento serán tratados na súa condición de responsable pola Xunta de Galicia-Consellería de Política Social e Igualdade coa finalidade de levar a cabo a tramitación administrativa derivada da xestión da concesión directa a través deste convenio que comprende verificar os datos e documentos que a entidade interesada achegue para comprobar a exactitude destes, levar a cabo as actuacións administrativas que se deriven e informar sobre o estado de tramitación.

O tratamento dos datos baséase no cumprimento dunha misión de interese público ou no exercicio de poderes públicos, conforme ás referencias recollidas no enlace <https://www.xunta.gal/información-xeral-proteccion-datos> derivada dunha competencia legalmente atribuída ao responsable do tratamento, así como o cumprimento das obrigas legais impostas ao dito responsable de conformidade co disposto no artigo 6.1, letras c) e e) do Regulamento (UE) 2016/679 do Parlamento Europeo e do Consello, do 27 de abril de 2016 e o artigo 8 da Lei orgánica 3/2018, do 5 de decembro, e en concreto a competencia e obrigas previstas nos preceptos básicos da Lei 38/2003, do 17 de novembro, da Lei 9/2007, do 13 de xuño, na Lei 39/2015, do 1 de outubro, na Lei 1/2016, do 18 de xaneiro e na Lei 4/2019, do 17 de xullo, de administración dixital de Galicia. Con todo, determinados tratamentos poderán fundamentarse no consentimento das persoas interesadas, reflectíndose esta circunstancia de conformidade coa normativa de aplicación.

A referencia a publicidade, en cumprimento da normativa de transparencia e subvencións, axustarase a dita normativa e coas limitación que esta establece.

Como destinatarias os datos serán comunicados ás administracións públicas no exercicio das súas competencias, cando sexa necesario para a tramitación e resolución dos seus procedementos ou para que a cidadanía poidan acceder de forma integral á información relativa a unha materia.



As persoas interesadas poderán solicitar o acceso, rectificación, oposición, limitación, portabilidade e supresión dos seus datos ou retirar, no seu caso, o consentimento outorgado a través da sede electrónica da Xunta de Galicia, ou nos lugares e rexistros establecidos na normativa reguladora do procedemento administrativo común, segundo se recolle en <https://www.xunta.gal/exercicio-de-dereitos>. O contacto coa persoa delegada de protección de datos e máis información consultarase no enlace <https://www.xunta.gal/proteccion-datos-persoais>.

#### **DÉCIMO QUINTA. *Comisión Mixta de seguimento***

Para o seguimento e coordinación das actuacións que conforman o programa a subvencionar polo presente convenio crearase unha comisión mixta e paritaria na que estarán representadas as partes asinantes do convenio.

Esta comisión, que se reunirá por petición de calquera das partes, será o mecanismo de actuación conxunta para o seguimento e avaliación das actuacións estipuladas no presente convenio, e estará formada por dúas persoas representantes da Consellería de Política Social e Igualdade e dúas persoas representantes do Concello da Peroxa, designados por cada unha das persoas representantes das partes así como ás súas suplentes.

A persoa que ocupe a presidencia será unha das persoas representantes da Consellería de Política Social e Igualdade, designada pola persoa titular da dirección xeral competente en materia de maiores e atención sociosanitaria.

A persoa que ocupe a secretaría, que actuará con voz pero sen voto así como a súa suplencia, será unha persoa adscrita á dirección xeral competente en materia de maiores e atención sociosanitaria, designada pola persoa que asuma a Presidencia.

Como órgano colexiado a comisión someterase ao réxime establecido na Lei 40/2015 do 1 de outubro, de réxime xurídico do sector público e na Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

#### **DÉCIMO SEXTA. *Réxime xurídico***

O presente convenio terá carácter administrativo rexéndose nos seus efectos polo establecido nas súas cláusulas, polo disposto na Lei 38/2003, do 17 de novembro; no Real decreto 887/2006, do 21 de xullo; na Lei 9/2007, do 13 de xuño; no Decreto 11/2009, do 8 de xaneiro e na Lei 40/2015, do 1 de outubro. No seu defecto, para resolver as lagoas e dúbidas que puideran presentarse, rexerase polo establecido na Lei 9/2017, de 8 de novembro, de contratos do sector público, pola que se traspoñen ao ordenamento xurídico español as



Directivas do Parlamento Europeo e do Consello 2014/23/UE e 2014/24/UE, do 26 de febreiro do 2014.

As cuestións litixiosas xurdidas acerca da interpretación, modificación e resolución serán resoltas pola Consellería de Política Social e Igualdade poñendo os seus acordos fin á vía administrativa. Contra elas cabe recurso potestativo de reposición ante o mesmo órgano que ditou a resolución, segundo o previsto no artigo 124 da Lei 39/2015, do 1 de outubro, se a resolución fose expresa no prazo dun mes.

Se o acto fora expreso, poderá formular un recurso de reposición, no prazo dun mes, ante o mesmo órgano que ditou a resolución, ou poderá interpoñer directamente un recurso contencioso-administrativo, no prazo de dous meses contados desde o día seguinte á notificación do acto que poña fin á vía administrativa, segundo o previsto no artigo 124 da Lei 39/2015, do 1 de outubro e na Lei 29/1998, do 13 de xullo, reguladora da xurisdición contencioso – administrativa.

Se o acto non fora expreso, poderá interpoñer un recurso de reposición en calquera momento a partir do día seguinte a aquel en que se produza o acto presunto, ou poderá formular directamente un recurso contencioso-administrativo, no prazo de seis meses que se contará para a persoa solicitante e outros posibles interesados, a partir do día seguinte a aquel en que, de acordo coa súa normativa específica, se produza o acto presunto, de conformidade co disposto na Lei 29/1998, do 13 de xullo, reguladora da xurisdición contencioso – administrativa.

Para tales efectos o tribunal competente será o Tribunal Superior de Xustiza de Galicia.

E en sinal de conformidade coas estipulacións do presente convenio, o asinan ambos os dous comparecentes no lugar e na data da sinatura dixital.

Pola Consellería de Política Social e Igualdade

A conselleira de Política Social e Igualdade

Fabiola García Martínez

Polo Concello da Peroxa

O alcalde da Peroxa

Manuel Seoane Rodríguez

